



19. august 2022

UKA 2022/77

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Namminersorlutik suliffeqarfiutillit immiaaqqanik, viinninik imigassallu kimittuunik eqqussisinnaangornissaat anguniarlugu Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaanik peqquneqassasut Inatsisartut aalajangiiffigisassaattut siunnersuut.**  
(Inatsisartunut Ilaasortaqaq Jens-Frederik Nielsen, Demokraatit)

### **Tungavilersuut**

Soormitaavaana toqqaannaq viinniisivimmiit frankrigimeersumit pitsaasumik rødvini­mik pisisinnaangitsunga maangalu Kalaallit Nunaannut najukkannut nassiutsillugu?

Soormitaavaana toqqaannaq immiorfimmiit belgiameersumit immiaaqqat karsi pisiarisinnaangikkikka toqqaannarlu maanga Kalaallit Nunaannut najukkannut nassiutsillugu?

Taakunanut Nioqqutissanik eqqussuineq annissuinerlu pillugit Inatsisartut inatsisaat inuinnaat immiaaqqanik, viinninik imigassallu kimittuunik eqqussisinnaanginnermut peqquteqarpoq.

KNR-mi 2011-meersumi atuarneqarsinnaavoq, piffissami tassani Naalakkersuisuusimasut assingusumik isumassarsiaqarsimagaluartut<sup>1</sup>. Siunnersuulli piviusungortinneqarsimanngilaq.

Nittartagaq aqputigalugu niuerneq nunarsuup sinneranut ammaassinikuuvoq, nunatsinnilu tamanna aamma atorluarneqalernikuuvoq, soorlu atisanik pisiniarnermi. Tuniniaaneq annertuneruvoq kissaatillu pineqarsinnaasarlutik. Immiaaqqanut, viinninut imigassanullu kimittuunut aamma tamanna atuuppoq, kisianniliuna inatsi oqartoq inuinnarnut tunisassianut taakkununga tamanna inerteqqutaasoq. Tamanna allanngortikkusuppara.

Inuinnaat soorunalimi allatuulli eqqussinermut akitsuutigineqartunut, angallannermut assigisaanullu atuuttunut akiliissapput, imaaqqissaartariaqarani toqqaannaq pisiner­mi akikinnerussasoq imaluunniit ajornanginnerussasoq, kisianni isumaqarpunga pisiniarfiit pisiassaataat kisimik aallaavigalugit inuit pisiassaat killeqaratik allanilli pisisinnaanissamin­nut periarfissaqassasut.

Innuttaasut kiffaangissuseqarnerat annikillisaannaavillugu pisinnaangilagut. Nunatsinni inuuniarneq pitsaanerulersinniarlugu inatsit qaavinnarsortut piiarniartigit.

Taamatut oqaaseqarlunga Naalakkersuisut akissutaat partiillu sinnerisa oqaaseqarnissaat qilanaaraakka.

### **Pisortanut aningaasatigut allaffissornikkullu kingunissai**

---

<sup>1</sup> [Imigassartugassatit viinnisugassatillu nammineq tikisissinnaangussavatit | KNR](#)



Siunnersuut akuerineqarnerasigut inatsi nalunaarullu allangortinneqarnissaanut allaffissornermut aningaasartuuteqartoqassaaq. Taakku 500.000 koruunit sinnernissaat naatsorsuutigineqanngilaq.

**Namminersolutik inuussutissarsiuteqartunut aningaasatigut allaffissornikkullu kingunissai**

Inuinnaat nunatta avataaniit namminneerlutik tunisassiat pisiarisalissagaluarunikkit suliffeqarfiit immiaaqqanik, viinninik imigassallu kimittuunik akigniaasut kaaviiartitaminni annikilleriaateqarnissaanik kinguneqarsinnaapput.

**Innuttaasunut aningaasatigut allaffissornikkullu kingunissai**

Innuttaasut immiaaqqanik, viinninik imigassallu kimittuunik toqqagassaqarnerulissapput, pisiniarfiit kisimik tuniniagaaniit killeqarunnaarlutik.